

Danki na contrato cu Gobierno anterior:

COASTAL TIN DERECHO DI IMPORTA TRAHADOR STRANHERO CU KIER SIN MESTER DI PERMISO!

ORANJESTAD (AAN) -- Ta secreto publico cu COASTAL ta trese cantidad di trahador di afo sin averigua si tin of no tin Arubiano pa ocupa e vacatura. Aparentemente tur trahador di e compania tin permiso pa traha, y tin un persona na DVZ cu ta tramita e permisonan pa COASTAL sin cu ningun hende ta worde registra na Job Center, ni haya conseho di Oficina di Labor. Hopi biaha DIARIO a trata di conversa cu e hefe maximo di DVZ riba e punto aki, ya cu den diferente ocasion e sistema ey ta worde critica fuertemente den nos

comunidad. Pero nunca un splicacion por a bin dilanti, pasobra ta decision di "ministro" (lesa ex-ministro di Husticia) y punto!. Den conversacion cu Ministro di Labor, don Eddy Croes DIARIO a trese e punto aki dilanti, unda cu e realidad ta pior di loke tabata bin den publicidad. Ministro Croes simplemente a contesta cu e berdad, cu nunca e gobierno anterior a tribi di bisa pueblo abiertamente. "COASTAL tin un contracto cu Gobierno den cual ta stipula cual ta e dere-

chonan di e compania aki. Un di e derechonan di COASTAL ta pa importa cuanto trahador stranhero cu e kier, ki ora cu kier, COASTAL no mester di pidi ningun permiso pa trese trahador stranhero pa bin traha na Aruba. Esaki tambe ta conta pa e companianan susidiario cu ta traha pa COASTAL. Gobierno anterior a firma e contract aki cu COASTAL, y un contract firma nos mester respete, den e sentido cu pa haci cambio mester bay di acuerdo cu e otro partido". Asina ta, Ministro Croes ta sigui bisa, cu pa gobierno actual cambia algo den e contract, COASTAL tambe mester ta di acuerdo cune. Gabinete Eman lo bay trata si di cambia e contract aki, cu no ta husto. Siman pasa caba tabata tin un conversacion al respecto y gobierno lo bolbe dialoga otro siman cu e compania aki to-

cante e asunto di trahador. "Na e momentonan aki Coastal enberdad tin derecho pa importa trahador stranhero. Nan ta bin cu 300 Filipino sin puntra mes si nos mester di nan aki na Aruba si of no", Ministro Croes ta indica.

CONTROL: Hecho ta, segun Ministro di Labor ta enfatiza, cu COASTAL ta traha na Aruba y for di e momento ey e compania aki ta cay bao leynan Arubiano, y nan mester tene nan mes na e leynan di nos pais. "Nos tin e autoridad pa controla, y esaki ta trabao di e Departamento di Labor, s enberdad tur compania incluyendo COASTAL ta tene nan mes na e leynan laboral di Aruba". Riba e aspecto aki Ministro ta splica cu Coastal no por parti mas contract cu un trahador unda cu ta stipula cu e ta traha mas cu 10 ora pa dia, of 50 ora pa siman. Akinan

gobierno si tin autoridad pa actua (den nos leynan ta para 8 ora pa dia, y di 45 pa 48 pa siman), y esaki ta trata di trahador local of stranhero. Tambe gobierno lo no permiti pa Coastal cera contract unda cu e salario ta inclui cuminda y cas y e trahador ta keda cu un minimo di sueldo na man, pasobra esaki ta contra e reglamentonan di trabao. Esey no ta existi na Aruba. Coastal lo tin cu atene su mes na paga salario minimo na e trahador, pa esaki voluntariamente dicidi cuanto e por paga na vivienda y cuminda. "Loke si nos tin cu admiti ta cu nos no por haci nada pa para ningun trahador stranhero di COASTAL ni "di ariba, ni di abao. Pero di otro banda nos si tin e autoridad pa controla e trabao loke nos ta bay haci tambe", Ministro Eddy Croes a informa, finalmente.

MAMA NO KIER SU YIU DI 13 AÑA MAS

ORANJESTAD (AAN): Net riba e Dia Nacional di Mucha, asistencia di Polis a worde solicita na un cas den Ponton, na unda Polis mester a intermedia entre mama y yiu homber.

Segun e yiu di 13 aña di edad, cu su mama no ta permitie den cas mas. Tur esaki pa motibo cu el a sali bay sir permiso di e mama.

Pa pone orde den cas y musta e joven cu ta su mayornan ta dicidi, esaki a sali

for di man.

E mama a admiti na Polis, cu el a saca e yiu for di cas y riba dje a dune un sota. Tur esaki pasobra e yiu no ta tene su mes na reglanan di cas.

HOMBER ARMA A PENETRA DEN CHOLLERHOUSE

ORANJESTAD (AAN): Chollerhouse a ricibi bishita di un homber desconoci arma cu un "Stangun".

Tabata den oranan di anochi, Chollernan lo a solicita pa presencia di Polis. Ora cu agentenan a presenta na e sitio, e supuesto "Rambo" lo a desaparece caba.

Segun informe e supuesto "Rambo" lo a presenta cu un "Stangun" y lo a menaza tanto paden y pafor di e Choller house (ex hotel Colombia).

Sin embargo Polis no a topa cu ningun supuesto "Rambo" cu su "Stangun". Por ta bien posible esnan den e Chollerhouse posiblemente lo por a mira "Pitufonan" arma.

